

## VI CONVOCATORIA PARA AVALIAR A ACTIVIDADE DOCENTE DO PROFESORADO DA UDC (PROGRAMA DOCENTIA) PARA O CURSO ACADÉMICO 2016/2017

Co Programa de Apoio á Avaliación da Actividade Docente (DOCENTIA), a ANECA-ACSUG pretende satisfacer as demandas das universidades e a necesidade do sistema educativo de dispoñer dun modelo e duns procedementos con que garantiren a calidade do profesorado universitario e favoreceren o seu desenvolvemento e recoñecemento. Todo isto de acordo coas directrices previstas na reforma da LOU e en estreita colaboración coas axencias das comunidades autónomas, coas que asinou convenios de colaboración específicos para que desenvolvan o programa no ámbito territorial da súa competencia mantendo en todo momento a coherencia ao utilizaren un modelo común.

Na convocatoria do ano 2007 a Universidade da Coruña, xunto con outras 63 universidades españolas, presentou o Programa Docentia, aprobado no Consello de Goberno da UDC nas súas sesións do 18/12/2007 e do 23/07/2008, logo de que a Comisión de Avaliación da ACSUG lle outorgase un **INFORME POSITIVO** que lle permitiu comezar coa fase de implantación do seu deseño de avaliación da actividade docente con vistas á súa certificación pola ACSUG e a ANECA.

Como consecuencia disto nos cursos académicos 2008/2009, 2009/2010, 2011/2012, 2013/2014, 2014/2015 a Universidade da Coruña publicou as cinco primeiras convocatorias do Programa Docentia para a avaliación da actividade docente do seu profesorado. A partir destes procesos introducíronse novos cambios que levaron a aprobar unha nova edición do manual deste programa na sesión do Consello de Goberno da UDC do 31 de maio de 2017.

### REQUISITOS DAS PERSOAS SOLICITANTES

Poderá solicitar a avaliación:

- Todo o profesorado que imparta docencia en calquera dos títulos oficiais dos centros propios da UDC con cinco ou máis anos de experiencia docente no ensino universitario e que ata o momento non fora avaliado neste programa.
- O profesorado que ten avaliado o período 2003/2004 a 2007/2008 e que non solicitara unha nova avaliación na V convocatoria.

- O profesorado que ten avaliado o período de 2004/2005 a 2008/2009.
- O profesorado que foi avaliado nas anteriores convocatorias e que non obtivera unha avaliación positiva, sempre que cumpra co establecido no apartado 3 do *Manual para a avaliación da actividade docente do profesorado da UDC*.

Para garantir o desenvolvemento do Programa nas mellores condicións administrativas e de avaliación, o máximo de solicitudes admitidas será de 350.

A Comisión Interna de Universidade, en función do número de solicitudes recibidas, determinará o profesorado que será admitido atendendo aos seguintes criterios:

1. Dedicación a tempo completo
2. Ser avaliado/a positivamente nos períodos de 2003/2004 a 2004/2005 e de 2004/2005 a 2008/2009 no Programa Docentia.
3. Ser avaliado en anteriores convocatorias e non acadar unha avaliación positiva, sempre que cumpra co establecido no apartado 3 do *Manual para a avaliación da actividade docente do profesorado da UDC*.
4. Número de horas impartidas en títulos de grao e mestrado universitario no período de avaliación.
5. Equilibrio entre solicitudes/profesorado admitido en cada rama de coñecemento.

### **INCOMPATIBILIDADES**

En aplicación do que está disposto no artigo 23.2.a) da Lei 40/2015, do 1 de outubro, de réxime xurídico do sector público, o profesorado que sexa avaliador/a ao presentar a súa solicitude para ser avaliado/a entenderase que renuncia a súa condición de avaliador/a.

### **PERÍODO QUE SE VAI AVALIAR**

Nesta convocatoria avaliarase o quinquenio docente correspondente aos cursos académicos 2009/2010 a 2013/2014.

## OBXECTIVOS DA AVALIACIÓN

Os **obxectivos xerais** que se pretenden alcanzar no proceso de avaliación da actividade docente do profesorado da UDC son:

- Recoñecer a importancia da actividade docente do profesorado no conxunto das actividades que este realiza dentro da Universidade da Coruña.
- Situar a avaliación da actividade docente do profesorado no marco das prácticas ao uso internacionalmente recoñecidas, aliñada cos criterios de garantía de calidade dos títulos universitarios.
- Favorecer o desenvolvemento do profesorado, a súa promoción persoal e profesional, de modo que poida ofrecer un mellor servizo á sociedade.
- Apoiar individualmente o profesorado proporcionándolle evidencias contrastadas sobre a súa actividade docente e a súa posible mellora.
- Favorecer o proceso de toma de decisións relacionadas coa avaliación, que afectan a diferentes elementos na política de profesorado, como o desenvolvemento de plans de formación.
- Contribuír ao necesario cambio cultural nas universidades respecto á avaliación da actividade docente e potenciar o intercambio de experiencias entre as universidades para a mellora continua da dita actividade.
- Favorecer a cultura da calidade aliñando a actividade docente do profesorado cos obxectivos da institución.
- Cumprir cun dos criterios para a acreditación de títulos e que se recolle no deseño dos sistemas de garantía interna de calidade en cada centro.
- Outros que nun futuro puideren ser de interese para a Universidade.

## CONSECUENCIAS DESTA AVALIACIÓN

A UDC, dentro da súa política de profesorado e de mellora das titulacións, declara de xeito explícito que a intención e finalidade con que desenvolve este programa recolle as seguintes consecuencias da avaliación da actividade docente:

- a) Elaborar un plan formativo para o profesorado que axude a mellorar as súas competencias profesionais. O profesorado que realizar a avaliación terá preferencia para participar no Programa de apoio ao ensino da UDC.
- b) Utilizar os datos, por parte dos centros para o proceso de seguimento e de renovación da acreditación dos seus títulos e o profesorado, pola súa vez, para os procesos de acreditación, as convocatorias de complementos autonómicos da Consellería de Cultura, Educación e Ordenación Universitaria da Xunta de Galicia e a súa consideración como mérito na concesión de axudas en convocatorias de innovación da UDC.

- c) Obter o profesorado con certificado de excelencia o recoñecemento do/a reitor/a da UDC.
- d) Valorar a avaliación positiva do Programa Docentia como mérito específico nos concursos para a provisión de prazas de persoal docente e investigador interino e laboral contratado da UDC, aprobado polo Consello de Goberno do 30 de abril de 2014.
- e) Incluír os resultados do Programa Docentia como obxectivo no Plan estratéxico 2020 da UDC e incorporar este como indicador de obrigado cumprimento nos plans estratéxicos dos centros da UDC.
- f) Incrementar a transparencia e información pública da institución mediante a difusión dos resultados da avaliación entre os distintos axentes implicados e especialmente entre o estudiantado.
- g) Deixar patente o compromiso da UDC coa calidade e mellora continua en liña cos criterios marcados pola ENQA e aceptados polas Axencias de calidade.

### FORMALIZACIÓN DAS SOLICITUDES

Para participar no Programa Docentia é necesario cubrir a solicitude na aplicación informática dispoñible no enderezo web: <https://www.qdsug.es/docentia/udc> desde o 1 de xuño até ás 23.59 h do día 7 de xuño de 2017. Esta aplicación xerará o impreso de solicitude, para participar no proceso, que se debe presentar na sede electrónica da UDC, no Rexistro Xeral da UDC, nos rexistros auxiliares ou por calquera dos procedementos establecidos no artigo 16 da Lei 39/2015, do 1 de outubro, do procedemento administrativo común das administracións públicas, dirixido ao reitor da UDC, desde o día 1 de xuño até as 14.30 h. do 8 de xuño de 2017.

### COMISIÓN DE SELECCIÓN

A selección do profesorado admitido a esta convocatoria será realizada pola Comisión Interna de Universidade constituída por:

**Presidenta:** vicerreitora de Oferta Académica e Innovación Docente

**Secretaria:** técnica da Unidade Técnica de Calidade (que actuará con voz pero sen voto)

**Vogais:**

- Vicerreitor de Profesorado e Planificación Docente
- Director/a da Unidade Técnica de Calidade

- Coordinadora da Comisión de Formación e Asesoramento
- Técnico responsable da avaliación docente no Servizo de Informática e Comunicacóns
- Cinco docentes:
  - o 1 da rama de Artes e Humanidades
  - o 1 da rama de Ciencias da Saúde
  - o 1 da rama de Ciencias
  - o 1 da rama de Ciencias Sociais e Xurídicas
  - o 1 da rama de Enxeñaría e Arquitectura
- Dous estudantes
- Unha representante sindical do PDI

A relación de persoas que compoñen a dita Comisión pódese atopar na páxina web da Unidade Técnica de Calidade [http://www.udc.es/utc/ferramentas\\_calidade/docentia/](http://www.udc.es/utc/ferramentas_calidade/docentia/)

### **CRITERIOS DE AVALIACIÓN**

Os criterios e o procedemento de avaliación serán os que están recollidos no Programa Docentia, aprobado polo Consello de Goberno da UDC na súa sesión do 31 de maio de 2017.

### **INFORMACIÓN SOBRE O PROGRAMA DOCENTIA**

As persoas interesadas poden solicitar información por correo electrónico no enderezo [docentia@udc.es](mailto:docentia@udc.es) ou nas extensións telefónicas 1069 e 1052.

O documento íntegro do Programa Docentia está publicado no enderezo web: [http://www.udc.es/utc/ferramentas\\_calidade/docentia](http://www.udc.es/utc/ferramentas_calidade/docentia)

A Coruña, 31 de maio de 2017

O reitor



Julio Abalde Alonso

## FASES E PRAZOS EN QUE SE DESENVOLVERÁ A CONVOCATORIA

|                                            |                                                                                                                                                                                                                                                                                                                                  |
|--------------------------------------------|----------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------------|
| Do 1 ao 7 de xuño de 2017                  | <p>Presentación de solicitudes a través da aplicación informática e entrega na sede electrónica e nos rexistros da UDC.</p> <p><b>NOTA: A aplicación informática pecha ás 23.59 h. do día 7 de xuño e a solicitude pódese presentar na sede electrónica ou nos rexistros da UDC até as 14.30 h. do día 8 de xuño de 2017</b></p> |
| 12 de xuño de 2017                         | Comunicación ás persoas solicitantes da aceptación ou rexeitamento da solicitude presentada en que se indicará o prazo de reclamacións.                                                                                                                                                                                          |
| Do 13 ao 23 de xuño de 2017                | As persoas admitidas incorporarán as evidencias na aplicación informática e remitirán á UTC, en formato electrónico, as copias dos xustificantes.                                                                                                                                                                                |
| 15 e 16 de xuño de 2017                    | Xornada formativa dirixida ao profesorado que foi admitido                                                                                                                                                                                                                                                                       |
| Ata o 21 de xullo de 2017                  | A UTC incorpora, na aplicación informática, as evidencias dispoñibles sobre as persoas admitidas.                                                                                                                                                                                                                                |
|                                            | Comunicación ás persoas admitidas da aceptación ou rexeitamento das evidencias que incorporaran á aplicación informática.                                                                                                                                                                                                        |
| Do 22 ao 31 de xullo de 2017               | As persoas solicitantes revisan as evidencias e presentan reclamación, en caso de desconformidade.                                                                                                                                                                                                                               |
| Do 1 ao 30 de setembro de 2017             | A persoa solicitante cubrirá o autoinforme de avaliación na aplicación informática.                                                                                                                                                                                                                                              |
|                                            | As autoridades académicas cubrirán os informes de cada persoa admitida na aplicación informática.                                                                                                                                                                                                                                |
| Do 16 de outubro ao 30 de novembro de 2017 | Os comités de avaliación docente levan a cabo o proceso de avaliación de acordo co Programa Docentia.                                                                                                                                                                                                                            |
| Do 18 ao 21 de decembro de 2017            | A Comisión Interna da Universidade enviaralle a cada profesor/a a resolución e, caso de que o profesorado non estea de acordo coa valoración, reclamará perante a CIU no prazo dun mes desde o día seguinte á recepción da resolución.                                                                                           |